



## Komunikado di prensa

19 di febrüari 2025

### **Cft: "Atendé e problemanan di Servisio di Impuesto di Kòrsou"**

**Willemstad – Den kòmbersashonnan resien ku Gobièrnu di Kòrsou, Kolegio di supervishon finansiero Kòrsou i Sint Maarten (Cft) a insistí ku mester atendé e problemanan serka Servisio di Impuesto di Kòrsou mas pronto posibel. For di 2021, e ingresonan di impuesto ta muestra un oumento, entre otro pa motibu di e medidanan di *compliance* ku ta tuma for di e tempu ei. Sinembargo, tambe tin problemanan persistente. Un Servisio di Impuesto profeshonal i honesto ta di importansia krusial pa por mantené e resultadonan positivo.**

For di e dia ku el a asumí su kargo, na 2021, Minister di Finanzas di Kòrsou ta traha riba mehorashon di e *compliance* tributario. Durante bishitanan na Servisio di Impuesto i Stichting Belastingaccountantsbureau, Cft a kòmbersá tokante di e akshonnan di mehora den e marko di e trayekto aki. Apesar ku a logra resultadonan positivo, mas profeshonalisashon di Servisio di Impuesto ta nesesario pa mantené i ekspandé e resultadonan aki.

#### **Reorganisashon Servisio di Impuesto**

Na 2024, investigashon di Stichting Overheidsaccountantsbureau a demostrá ku den e implementashon di legislashon tributario, tabata tin kasonan di tratamentu preferensial indebido di parti di Ontvanger. Ademas a konstatá ku no ta kumpliendo ku e markonan legal. Esaki ta afektá e konfiansa den Servisio di Impuesto, i ademas e ta trese riesgonan pa e disponibilitat di paga impuesto. Tin plannan avansá pa reorganisá i modernisá Servisio di Impuesto. Cft a urgi Konseho di Minister pa priorisá e reorganisashon aki mas tantu posibel, pasobra un Servisio di Impuesto honesto i transparente ta kontribuí na e salú finansiero di Kòrsou. Den e marko aki, Cft tambe a pidi atenshon pa e reforma di e sistema tributario. Akinan tambe tin oportunidatnan pa mehorá *compliance*, i di e manera ei, oumentá e ingresonan. Asina ta krea posibilidatnan pa por baha e preshon tributario haltu na Kòrsou.

#### **Presupuesto 2025**

Kòrsou ta presentá surplusnan presupuestario multianual, prinsipalmente pa motibu di e oumento den e ingresonan di impuesto. E pais tambe ta hasiendo progreso den e otorgamentu di lisensianan na proveedónan di weganan di azar online. Di e manera aki ta krea espasio pa implementá reformanan sumamente antisipá, por ehèmpel den kuido i seguridat sosial. E reformanan aki lo benefisiá tur siudadano di Kòrsou. Den e marko aki, Cft tambe a pidi atenshon pa e elaborashon mas detayá di e solushon pa e problemátika finansiero di Curaçao Medical Center.

[Fin di komunikado]

#### **Potrèt:**

Nathan Roosberg

#### **Deskripsjon di potrèt:**

Mas profeshonalisashon di Servisio di Impuesto ta nesesario.

#### **Nota pa e redakshon – no publiká**

Persona di kontakto di Cft:



**KOLEGIO DI SUPERVISHON FINANSIERO KÒRSOU I SINT MAARTEN**

De Rouvilleweg 39  
Willemstad, Kòrsou

T (+5999) 4619081

info@cft.cw

Sekretariado di Kolegionan di supervishon finansiero  
Telefòn +5999 461-9081 / +5999 461-9082 / +5999 461-9084  
Koreo elektròniko info@cft.cw  
Wèpsait www.cft.cw

**Kontaktonan di prensa:**

Jefka Alberto  
Telefòn +5999 512-6861